

Njan aagban ki PIITA ηmee ki na

¹ Min Piita u ye Yesu Kristo aakpambal na le ηmee kigban kee m tii Uwumbər aanib bi ye biwəwəm dulnyaa wee ni, ki yaa ki bi Pontus aatiη ni, ni Galasia aatiη ni, ni Kapadosia aatiη ni, ni Asia aatiη ni, ni Bitinia aatiη ni na. ²Tite Uwumbər nan nyan nimi waageehn pu, ki cha Waafuur Nyaan ηa nimi chain, ni li keei Yesu Kristo aaməb, aan Uwumbər di cha pinn nimi Yesu aasin pu. Uwumbər ηa tinyoor ηa ni pu, ki tii nimi nsuudoon pam.

Limakl li bi n-yoonn məmək na

³ Cha ti pak Uwumbər u ye Tidindaan Yesu Kristo Aate na; ba pu? u san timi kinimbaak sakpen a, ki gir ma timi lelee, ki di timi ηa waabim. U nan fikr Yesu Kristo nkun ni. Nima le ti kpa limakl li bi n-yoonn məmək na. ⁴Ti mak ke ti ga sil kan tinyoor ti Uwumbər di siin paacham kiir timi na. Tinyoor ngbaan aan ηmaa bii, kaan ηmaa wəη, kaan doo. ⁵Naah gaa Yesu ki kii na, nima le Uwumbər aapəən biin ni pu, ki ti saa buyoonn ni ga kan waah ga gaa nimi lii mbaməm pu na, kookoo aataadaal.

⁶Nima le ni kpa mpopiin. Ni yaa po kpa mpom-biin ni yunn siib dandana wee, falaa aabəη ponn ni kan, ni li kpa mpopiin; ⁷ba pu? falaa ngbaan ga mək ke ni gaa Yesu ki kii mbaməm aan naa gaa.

Naah gaa u ki kii pu na jer salmaa u ga bii na. Bi joo salmaa pu mmii ponn ni ke bi lik ke u ŋan aan waa ŋan. Kina le Uwumbər cha ni ji falaa ke u lik ke ni gaa u ki kii mbaməm aan naa gaa. Ni yaa gaa u ki kii mbaməm kan, le ni ga kan mpakm ni nnyun bundaln Yesu Kristo ga nyan ubaa mpaan pu na. ⁸ Naa kee kan u, le ni gee u. Ninimbil aa waa u dandana wee, le ni gaa u ki kii. Nima le ni kpa mpopiin sakpen, ki pak Uwumbər, kaa ŋmaa len naah kpa mpopiin ki ti saa pu na. ⁹ Naah gaa Yesu ki kii na, le u gaa nimi lii.

¹⁰ Tə, n-yaayoonn na aabənbatiib bi nan tuk binib Uwumbər aah ga ter nimi pu na, nan dakl lik mbaməm, ki ban ke bi bee Uwumbər aah ga ŋa pu ki gaa binib lii na. ¹¹ Le Kristo Aafuur Nyaan mu nan bi bibənbabr ngbaan ponn ni na mək bi ke uma Kristo ga ji falaa, le ki nin kan nnyun falaa ngbaan aapuwəb. Le bi nan ban bi bee ke ulau ga ji falaa ngbaan, ki ban bi bee buyoonn u ga ji falaa ngbaan na. ¹² Le Uwumbər nan mək bi ke baah len tibər ti na, baa len ke bi ter bima bibaa, bi len ke bi ter nimi la. Le ni ŋun tibər ngbaan dandana wee. Uwumbər cha Waafuur Nyaan nyan ni paacham ki tii binib mpəən bi tuk nimi tibənyaan tee. Tibənyaan timina le Uwumbər aatuuntiib ban ke bi bee taatataa.

Ni li bi chain man

¹³ Nima pu na, ni li dak ilandak i ŋan na, ki li chur nibaa, ki li kpa limakl n-yoonn məmək; ba pu? Yesu Kristo yaa nyan ubaa mpaan pu kan, u ga ŋa tynoor ŋa ni pu la. ¹⁴ Ni li keei Uwumbər aaməb. Buyoonn naa nan kee nyi nsan mu ŋan na, le ni nan dii nisui aah gee pu na. Ni taa ki dii

kina. ¹⁵ Cha nimi aabimbin məmək li bi chain, ke Uwumbər u yin nimi na aabimbin aah bi chain pu na. ¹⁶ Ni ηmee Uwumbər Aagbaη ni ke Uwumbər bui nimi, “Min Uwumbər bi chain la; nima pu na, ni mu li bi chain man.”*

¹⁷ Ni yaa mee Uwumbər kan, ni yin u ke Nite la. Nima pu na, ni li san u buyoonn ni bi na; ba pu? waa pak ubaa ki jer uken. U ga ji binib məmək aabər baah tun pu na. ¹⁸ Niyaajatiib nan bi mbimbin yəl yəl ponn ni. Ni nyi ke u gaa nimi lii ki nyan nimi mbimbin ngbaan ponn ni. Naa ye tiwan ni ga bii ke ηimombil na, le u di pan ki gaa nimi lii. ¹⁹ U nan di Kristo aasin mu jer ηimombil na le gaa nimi lii; uma Yesu nan di ubaa toor kitork ki tii Uwumbər, ki bi ke upihbo nyaan u kaa kpa iween ibaa na. ²⁰ Uwumbər aa nan kee naan dulnyaa le ki nyan Kristo ke u li ye kitork ngbaan. Naah nan ηeer na, le u dan dulnyaa wee ni, nimi pu. ²¹ U pu, le ni gaa Uwumbər ki kii. U nan fikr u nkun ni ki nyuη u. Nima pu le ni gaa Uwumbər ki kii ki kpa limakl.

²² Ni kii Uwumbər aabər ti gbii na la. Nima le cha nimi aabimbin bi chain. Le ni sil gee ninaabitiib. Nima pu na, ni li beenin gee təb mbaməm. ²³ Bi ma nimi lelee la. Naa ye unibən u ga kpo na le ma nimi lelee. U ma nimi na aan kpo. Uwumbər di waaməboln li kpa liməfal ki ga li bi n-yoonn mu kaa kpa ndoon na le gir ma nimi lelee. ²⁴ Ni ηmee Uwumbər Aagbaη ni ke,
“Binib məmək bi ke timoor na la.
Baanyaan bi ke mmopuun na la.

* **1:16** : Lik Liifai Yaab 11.44-45; 19.2.

Timoor yəl mala, le mmopuun mu gbaar,

²⁵ Uwumbər aaməboln ma ga li bi

ki ti saa n-yoonn mu kaa kpa ndoon na.”†

Liməboln ngbaan le ye tibənyaan ti bi tuk nimi na.

2

Ni taa ki tun titunwanbir man

¹ Nima pu na, ni taa ki li kpa kinanaŋ, ki taa ki ŋmanni təb, ki taa li ye binib bi ŋmanni ke bi ŋan na, ki taa li kpa lipiipoln, ki taa li bii binib.

²⁻³ Nimi nibaa lik ki kan Tidindaan aah kpa tiŋann pu na. Nima pu na, ni li ban Uwumbər aaməbon ke ubopəən aah ban mbiin pu na. Uwumbər aabər gbii, ki ga ter nimi ke ni moo dii waasan mbaməm, ki ŋmar.

⁴ Dan Tidindaan u ye liməfadaan na chee man. U naahn litakpal li bidimaab yii li na la. Le Uwumbər lee u ke u ŋan sakpen. ⁵ Ni mu bi ke ŋitakpal ŋi kpa liməfal na. Uwumbər di nimi maa lidichal ke Waafuur Nyaan li bi li ni. U ban ke ni li ye uma ubaa aatotoorb, ki li tun waatuln, Waafuur Nyaan aapəən pu. Yesu Kristo pu, le u ga gaa nimi aatuln ngbaan. ⁶ Uwumbər Aagbaŋ len ke,

“Lik, m lee litakpal li ŋan na ki di bil Sionn aatiŋ ni. M di litakpal ngbaan ki di siin kaalələŋ ni, le unii umək gaa u ki kii na aan ji iniməən.”*

⁷ Nimi bi gaa u ki kii na, u ŋan ni chee sakpen la. Le binib bi kaa gaa u ki kii na, bi li nyi ke Uwumbər Aagbaŋ len ke,

“Litakpal li bidimaab yii li na,

† **1:25** : Lik Aisaya 40.6-8. * **2:6** : Lik Aisaya 28.16.

lima le ye litakpajal,”†

⁸ ki ki len ke,

“Binib bibaa ga gbeer litakpal ngbaan ki lir.

Litakpal ngbaan pu le bi ga lir.”‡

Baa kii Uwumbər aabər; nima le cha bi lir, waah siin bi pu na.

⁹ Tɔ, nimi bi gaa Uwumbər ki kii na le ye waanileekaam. Ni ye Uwumbər u ye Ubərkpaaan na aatotoorb, ki ye litimbol li bi chain na, ki sil ye Uwumbər aanib. U lee nimi ke ni li tuk binib waah ɲan sakpen pu na; ba pu? u nyan nimi mbəmbəɔn ni, ki di koon waawiihn mu ɲan sakpen na ni. ¹⁰ N-yoonn mbaa naa nan ye Uwumbər aanib. Dandana wee ni ye Uwumbər aanib la. N-yoonn mbaa Uwumbər aa nan san nimi kinimbaak. Dandana wee u san nimi kinimbaak.

Uwumbər aatutum

¹¹ Maanigeekaab, ni ye biwəwəm ni bisachum dulnyaa wee ni la. Nima pu na, m gan nimi, ni taa kii nisui aah gee pu na; ba pu? nisui aah gee pu na kiir nimi Uwumbər aasan ni. ¹² Ni bi binib bi kaa dii Uwumbər aasan na aakaasisik ni la. Ni li tun lituln li ɲan na bi chee. Le bi yaa bii nimi ke ni ye bakadam kan, nimi aatunyaan chee bi ga kan ke ni ɲan. Nima le ga cha bi nyuɲ Uwumbər bundaln u ga ji binib tibər na.

¹³ Tɔ, ni li keei nimi aaninkpiib məmək aamɔi Tidindaan pu. Ni li keei nimi aabərkpaaan u joo binib məmək na aaməb. ¹⁴ Waah kaan bininkpiib ntim ni na, ni li keei bi mu aamɔi. Ba pu? u kaan bi ke bi daa binib bi tun lituln li kaa ɲan na

† 2:7 : Lik Ilahn 118.22. ‡ 2:8 : Lik Aisaya 8.14-15.

aatafal, ki ban ke bi pak binib bi tun lituln li n̄an na. ¹⁵ Uwumb̄or ban ke ni tun litulnyaan aan ki cha bij̄orb bi kaa nyi nibaa ki bii n̄imi na n̄min la. ¹⁶ Ni bi nibaa pu la. Nima le aa tii n̄imi nsan ke ni li chuun n̄ani bakaa. Ni li bi ke Uwumb̄or aatutum aah ba ga li bi pu na. ¹⁷ Ni li pak binib m̄əm̄ək, ki li gee binib bim̄ək dii Yesu aasan na, ki li san Uwumb̄or, ki li pak ub̄orkpaan na.

Yesu Kristo aafalaa aam̄əkl

¹⁸ Binib bi ye binaagbiib ni ponn ni na, ni li pak nidindatiib mbam̄əm, ki li keei baam̄əi. Bi yaa ye binibam̄əm, bee bi ti ki ye bakadam kan, ni li pak bi. ¹⁹ Unii u kaa n̄a nibaa na, bi yaa n̄a u falaa aan u yaa ji lim̄or Uwumb̄or pu kan, nima le n̄an Uwumb̄or chee. ²⁰ Bi yaa gbaa n̄imi, n̄imi aatunwanbir pu aan ni yaa ji lim̄or kan, nima le aan cha ubaa pak n̄imi. Ni mu yaa kan falaa n̄imi aatunyaan pu, ki yaa ji lim̄or kan, nima le ga piir Uwumb̄or aasui. ²¹ Ba pu? Uwumb̄or yin n̄imi bi dii u na ke ni li ji falaa; ba pu? Kristo mu nan jin falaa ni pu. Nima le ye lim̄əkl ki tii n̄imi, ke ni li dii waataabuu. ²² Waa nan n̄a titunwanbir aatuln libaa, ki mu aa nan m̄ən n̄nyam̄ən mubaa. § ²³ Baah seei u na, waa giin sii bi. Waah jin falaa na, waa len ke u ga teen bi. U di ubaa n̄a Uwumb̄or u ji tib̄or m̄əm̄ək mbam̄əm na aañaal ni la. ²⁴ U nan kpo nd̄əpuinkoo pu timi aatunwanbir pu, ki sil timi aasisiyyaan ki gaa timi aatafadaan. Nima pu na, ni di titunwanbir m̄əm̄ək lii, ki li dii mbimbin mu n̄an na. Waah gaa tigbar ti na pu, le Uwumb̄or tii n̄imi laafee. ²⁵ Ni nan bi ke ipiih i yenn na, le

dandana wee, ni gir ni Kristo chee. U kpa a nimi ke upihkpaal aah kpa ipiih pu na, ki kii nimi aamɔfal.

3

Puutiib ni chatiib aabɔr

¹ Bipiib, ni li keei nichatiib aamɔi. Ni yaa keei baamɔi, aan chatiib yaa bi, kaa kii Uwumbɔr aabɔr kan, nibaakan bi ga gaa u ki kii nimi aabimbinyaan pu. Hali ni yaa kaa len tibaa kan, ² bi ga kan ke ni san Uwumbɔr ki kpa mbimbin mu bi chain na. ³ Bipiib, tiwan ni ga cha ni li ŋan na aa ye tiyikpir ti buu na, kaa ye nleen mu kpa kidaak na, kaa ye tiwanpeenkaan nyaan. ⁴ Tiwan ni ga cha ni li ŋan na le ye mbimbin mu ŋan na. Ni yaa kpa mbimbin suuna kan, nima le ye kinyaan ki kaan fir, ki ŋan sakpen Uwumbɔr chee na. ⁵ N-yaayoonn na aapiib bi nan bi chain ki kpa limakl Uwumbɔr pu na, nan keei bichatiib aamɔi, nima le nan cha bi kpa kinyaan ki nan ŋan binib chee. ⁶ Sara nan ŋani kina la. U nan keei uchal Abraham aamɔb, ki yin u ke udindaan. Ni yaa tun lituln li ŋan na, ki yaa kaa san ijawaan ibaa Uwumbɔr aasan ni kan, ni kpaln Sara aabisatiib la.

⁷ Bijab, ni mu li nyi naah joo nipuutiib pu na. Bipiib aa kpa mpɔɔn ke bijab aah kpa pu na, nima na, ni li pak bi; ba pu? nimi ni bima le ga kpaan kan Uwumbɔr aapiin i ye limɔfal li kaa kpa ndoon na. Ni li joo bi mbamɔm, nimi aameel taa ŋa yɔli.

Ji mbimbinyaan aafalaa

⁸ Kookoo aabɔr le ye ke ni mɔmɔk li kpaan kimɔbaan, ki cha nitafal li bi tɔb ni, ki li gee tɔb

ke naabitiib na, ki li san tɔb kinimbaak, ki sunn nibaa taab. ⁹ Binib yaa ŋa nimi bakaa kan, ni taa teen bi. Bi yaa sii nimi kan, ni taa sii bi ki teen. Ni bui bi ke, “Uwumbɔr ŋa tinyoor ŋa ni pu;” ba pu? Uwumbɔr yin nimi ke u ŋa tinyoor ŋa ni pu la. ¹⁰ Ni ŋmee Uwumbɔr Aagbaŋ ni ke,

“Unii yaa ban ke u li kpa mpopiin, ni mbimbin mu mɔ na kan,

u taa ki len tibɔbir, ki taa ki mɔni inyamɔn,

¹¹ ki taa ki tun lituln li kaa ŋan na;

u tun lituln li ŋan na,

ki li ban nsuudoon linimaln;

¹² ba pu? Tidindaan Uwumbɔr aatafal bi bininyaam ni,

ki ŋun baameel n-yoonn mɔmɔk,

le ki yiil binib bi tun titunwanbir na.”*

¹³ Tɔ, ninimbil yaa man lituln li ŋan na pu kan, ubaa ga ŋa nimi bakaa aa? ¹⁴ Ni mu yaa kan falaa lituln li ŋan na pu kan, Uwumbɔr aanyoor bi ni pu la. Ni taa san unii ubaa ijawaan, ki taa cha ilandak li joo nimi.† ¹⁵ Ni li pak Kristo nisui ni, ki di u ŋa Nidindaan. Ni li gor n-yoonn mɔmɔk, unii yaa nan baa nimi kan, ni ga ŋmaa tuk u naah kpa limakl pu na. Ni tuk u suuna, ki pak Uwumbɔr.

¹⁶ Ni li ŋani ni ŋan na n-yoonn mɔmɔk, le naah dii Kristo mbamɔm ki kpa mbimbin mu ŋan na na, nima le ga cha inimɔn chuu binib bi sii nimi ki len nimi tibɔbir na. ¹⁷ Ni yaa ye Uwumbɔr aageehn ke aa ji falaa litunyaan pu kan, ni soor ni aa ji falaa titunwanbir pu. ¹⁸ Ba pu? Kristo ubaa nan kpo nfum mbaa timi aatunwanbir pu. Kristo u

* **3:12** : Lik Ilahn 34.12-16. † **3:14** : Lik Aisaya 8.12.

ye uninyaan na nan kpo timi bi ye tiniwanbir na pu, ke u di ti ni Uwumbər kpaan. Bi nan ku waawon, le Uwumbər Aafuur Nyaan tii u liməfal, ¹⁹ le u nan buen ki ti len tibənyaan binib aawiin i bi kiyondiik ni, kitekpiitinj ni na chee. ²⁰ Bi nan bi Nowa aayoonn, kaa nan kii Uwumbər aaməb, le u nan jin limər bi pu, ki kii n-yoonn mu Nowa nan ti kp̄ii buŋəb doo na. Binib biniin baanja le nan koo buŋəb ngbaan ni, le ki ŋmar nnyun pu. ²¹ Nnyun ngbaan le ye baah muini binib nnyun ni na aaməkl. Dandana wee, bi yaa muin nimi nnyun ni kan, ni ŋmar a; ba pu? Yesu Kristo nan fikr nkun ni. Nima le cha ni ŋmar. Bi yaa muin nimi nnyun ni kan, naa ye ke bi fu nimi aawon nnyun tiwon aajəŋ pu la. Ni ye ke ni di titunwanbir di lii, ki puu tipuur ke ni ga dii Uwumbər. ²² Yesu Kristo nan buen paacham ki ti bi Uwumbər aarjəngii wəb. Le Uwumbər di waatuuntiib, ni paacham yaab, ni kinimbəŋ ni kaapəən məmək ŋa Yesu Kristo aarjaal ni.

4

¹ Tə, Kristo aah nan joo unibən aawon na, u nan jin falaa. Nima pu na, ni mu kii ke ni ga ji falaa man, ke waah nan kii pu na. Waah nan jin falaa tiwon ponn ni pu na le u nan kuln titunwanbir. ² Nima pu na, naah laa bi dulnyaa wee ni na, ni taa ki kii nisui aah gee pu na, ni li keei Uwumbər aah gee pu na. ³ Ni nan tun titunwanbir n-yoonn mu jer na; ni ŋeer kina. Ni nan ŋani ke binib bi kaa nyi Uwumbər na aah ŋani pu na, ki dii bipiib, ki dii tiwan ni kaa ŋan na aakpeek, ki nan kuuni təb ki nnyun ndaan gbii, ki tun lituln li kaa ŋan

na, ki dii ŋiwaa ŋi sukr ponn ni na. ⁴ Naah kaa ki kpaani titunwanbirdam ngbaan chee ki ŋani kina na, ni gar bi la, le bi seei nimi. ⁵ Bi ga sil Uwumbər aanimbiin ni ki len baah tun pu na. U gor ke u ji binib bi fu na, ni binib bi kpo na tibər. ⁶ Nima le cha bi nan tuk binib bi kpo na Uwumbər aabənyaan tee. Bi nan kpo ke unibən mək aah kpo pu na. Le bi nan tuk bi Uwumbər aabənyaan tee, ke bi kan nsan ki gaa u ki kii aan baawiin kan Uwumbər aaməfal ki li bi u chee.

Ni li ye Uwumbər aatutunyaam

⁷ Tə, ni gur siib le tiwan məmək ga doo. Nima pu na, ni li kpa laasaab, ki chur nibaa, ki mee Uwumbər. ⁸ Tiwan ni jer tiwan məmək na le ye ke ni li gee təb mbaməm; ba pu? aa yaa gee unii kan, aa ga di cha pinn u titunwanbir pam. ⁹ Ni li channi təb tichann ki taa ŋulni. ¹⁰ Uwumbər tii ni məmək Waafuur Nyaan aapiin la. Waah tii nimi ipiin aabəŋ aabəŋ na, ni di ipiin ngbaan ter biken. ¹¹ Uwumbər yaa tii unii ipiin ke u len Uwumbər aabər kan, u teer ke ni ye Uwumbər aabər le u len. Uwumbər yaa tii unii ipiin ke u ter biken kan, u li ter bi Uwumbər aah tii u mpəən pu na. Ni li nyuŋni Uwumbər tiwan məmək ni, Yesu Kristo pu. Uma le yeh mpakm ni mpəən n-yoonn mu kaa kpa ndoon na. Amii.

Yesu Kristo aadidiliib aah ji falaa pu na

¹² Njətiib bi m gee bi na, ni ji falaa u wu sakpen na la. Ni taa dak ke ni ye tiwachann la. Uwumbər cha ni ji falaa ke u lik nimi aabimbin aah bi pu na la. Ni taa cha ni gar nimi. ¹³ Ni li kpa mpopiin; ba pu? ni yaa ji falaa u Kristo nan jin na kan, ni ga

li kpa mpopiin sakpen bundaln u ga gir ni ki nan mək waah nyuun pu na. ¹⁴ Bi yaa sii nimi Kristo aayimbil pu kan, Uwumbər aanyoor bi ni pu la; ba pu? Uwumbər Aafuur Nyaan mu ɲan sakpen na bi ni ni. [Bima le seei Kristo, le nima pak u.] ¹⁵ Le ni ponn ni ubaa yaa jin falaa linikul pu, bee kinaayuk pu, bee baka baka pu, bee libəbaln pu kan, nima aa ɲan. ¹⁶ Tɔ, unii yaa jin falaa Yesu Kristo aasan pu kan, u taa cha inimɔɔn li joo u. U li pak Uwumbər waah ye Yesu Kristo yoo na pu.

¹⁷ Ni ɲeer Uwumbər piin ki ji binib tibər. U ga puen ji waanib le tibər, le ki nin ji biken tibər. U yaa puen ji timi waanib tibər kan, binib bi kaa kii waabənyaan na aabər ga doo kinye? ¹⁸ Ni ɲmee Uwumbər Aagbaɲ ni ke,
 “Ni yaa pəɔ bininyaam ɲmar kan,
 titunwanbirdam bi kaa pak Uwumbər na
 ga tee ɲa kinye ki ɲmar?”*

¹⁹ Nima pu na, unii yaa ji falaa Uwumbər aageehn pu kan, u li tun lituln li ɲan na, ki di ubaa ɲa Uwumbər u nan naan u ki ye mbaməndaan na aajaal ni.

5

Uwumbər aanib aabimbin

¹ Tɔ, m ye Yesu aanib aaninkpel, ki nan kan Kristo aah jin falaa pu na, ki tuk binib kina. M mu ga ji waamɔɔn mu ga nya mpaan pu na. Nima pu na, m gaɲ nimi bi ye Yesu aanib aaninkpiib na, ² ni li ter Uwumbər aanib bi bi nido na, ke upihkpaal aah lik waapiih pu na. Ni taa ter bi limukl aaterm.

* **4:18** : Lik Niyatanak 11.31.

Ni li ter bi nimi aageehn, Uwumbər aah ban pu na. Ni taa ter bi ɲimobil pu, ni li ter bi ni mpopiin. ³ Uwumbər di bi ɲa niɲaal ni la. Ni taa ɲani ke naah ye bidindatiib le na. Cha nimi aabimbinyaan mək bi baah ga dii pu na. ⁴ Ni yaa ɲani kina kan, buyoonn upihkpaaninkpel ga gir ni na, ni ga kan lipal li mə sakpen ki ga li bi n-yoonn mu kaa kpa ndoon na.

⁵ Nimi bi kaa por na, ni li keei binib bi kpeln nimi na aaməb. Ni məmək li sunni nibaa taab, ki li ter təb. Ba pu? Uwumbər Aagbaɲ len ke, “Uwumbər yiil kalmbaanidam, le ki lik faar binib bi sunni bibaa taab na.”* ⁶ Nima pu na, ni li sunni nibaa taab, Uwumbər u yeh mpəɔn məmək na aɲaal ni. Le ni yaa nan ɲeer kan, u ga nyuɲ nimi. ⁷ Limukl limək muk nimi na kan, ni di li məmək ɲa Uwumbər aɲaal ni; ba pu? utafal bi ni ni.

⁸ Ni li kpa laasaab ki li nyi; ba pu? kinimbəɲ ki ye nimi aadin na chuun gonni, ki ban ke ni di Uwumbər aasan lii. Ki bi ke uchinn u chuun tar, ki ban unii u ki ga chuu ki ɲmə na la. ⁹ Ni yii u man. Ni gaa Uwumbər ki kii mbaməm man, ki taa di cha. Ni nyi ke ninaabitiib bi bi dulnyaa wee ni na mu bi ji falaa ke naah ji pu na la. ¹⁰ Ni yaa ji falaa ni yunn siib kan, Uwumbər ga ter nimi, ki tii nimi mpəɔn ni li dii u mbaməm, ki taa gir puwəb. Ba pu? nterm məmək nyan ni uma le chee. U nan yin nimi Kristo pu, ke ni nan ji waaməɔn n-yoonn mu kaa kpa ndoon na. ¹¹ Uma le yeh mpəɔn məmək n-yoonn mu kaa kpa ndoon na. Amii.

* 5:5 : Lik Njyatanjak 3.34.

Kookoo aadoon

¹² Tɔ, m nyi ke Silfanus, u ye tina aabo na, bi mbamɔm la. Uma le ter mi le m ηmee kigban waatiir kimina tii nimi ki pɔɔk nitaakpab, ki tuk nimi mbamɔn ke maah ηmee pu na le ye Uwumbɔr aabɔr, ki ye mbamɔn. Ni taa di ti lii.

¹³ Yesu aanib bi bi Babilon aatiη ni na dooni nimi. Bi ye binib bi Uwumbɔr nyan bi na. Maabo Mak mu dooni nimi. ¹⁴ Ni li dooni tɔb ke binib bi gee tɔb na.

Uwumbɔr tii nimi bimɔk ye Kristo yaab na nsu-udoon.

Uwumbor aagban Bible without Deuterocanon in Konkomba

copyright © 2014 Wycliffe Bible Translators, Inc.

Language: Konkomba

Translation by: Wycliffe Bible Translators

Contributor: Wycliffe Bible Translators, Inc.

Copyright Information

© 2014, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The Bible without Deuterocanon

in Konkomba

© 2014, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2015-03-17

PDF generated using Haiola and XeLaTeX on 11 Nov 2022 from source files
dated 29 Jan 2022

c7765cba-ce13-51c8-80b3-68fach5fdf4a